

Yëkkuö kit Pablo tö Filemón a Filemón

Pablo tö yëkkuö i' kit mik ie' bak Roma s'woto wé a etä. E' kèwö ska' ta ie' tö yëkkuö kit Éfeso ena Filipos ena Colosas wakpa a. Ie' tö yëkkuö i' kit iklé eköl kiè Filemón e' a. Ie' serke Colosas eë. Ie' tö kanè méso kè patuëta' ese to'ttsa eköl e' kiè Onésimo. E' ukuöki ta Onésimo tö ie' íyi blëlur ta ibakshkarmi. E' kèwö ska' ta akblökwakpa ttekelur. E' kuëki Onésimo bakshkarmi dö Roma. Eë Pablo tso' wötëulewä Jesús tté buaë paké kuëki. Pablo tö Onésimo a Jesús tté buaë paké ta ierblé Jesús mik. E' kuëki ie' shkakmine iwökir Filemón ska' ie' a kët kët chökne.

E' kuëki Pablo tö yëkkuö i' kit Filemón a as ie' kè ulurka Onésimo ki. Pablo tö iché Filemón a tö Jesús éna ie' dalène taië ena ì sulu nuí tso' ie' ki e' olo'ya'itö ta iki'wa buaë. Es ñies ie' kawötä Onésimo ki inuü olo'yök ta ikiökwa wes iyami ekka es.

S'kiè Onésimo griegoie e' wà kiane ché kanenamé buaë. Erë yëkkuö i' tö ichè tö kam Onésimo tö Jesús tté klö'ü etä ie' kè dö'r kanenamé buaë. Es Pablo tso' ichök tö Jesús batamik Onésimo dömi wes ikiè wà kiane ché es.

Shkë'wè

¹A Filemón, ye' dö'r Pablo tso' wötëule Cristo Jesús tté paké kuëki, e' tso' yëkkuö i' shtök be' a. Ye' ena s'yami Timoteo, e'pa tö be' shkë'wémi. Be' dalër taië sa' éna, ñies be' tso' kaneblök Cristo a wes sa' es. ²Ñies sa' tö s'yamipa kiè Apia ena Arquipo, e'pa shkë'wémi. Arquipo dö'r Jesucristo tté buaë e' tsatkökwak buaë wes sa' es. Ñies Skëképa Jesús icha erule daparke be' u a, e'pa kos shkë'wémi sa' tö. ³Skëköl dö'r S'yé ena Skëképa Jesucristo, as e'pa er buaë chò ena sene bèrè mù a' a.

Pablo tö wéstela ché S'yé a Filemón ki

^{4,5}Ye' tö be' tté ttsé tö be' erblöke buaë Skëképa Jesús mik, ñies s'batse'r malepa kos dalër be' éna. E' kuëki mik ye' ttöke Skëköl ta, etä kekraë wéstela chekeyö be' dalërmik. ⁶Ttè mik se' erblöke e' a be' e'

tkówa buaë s'yamipa ta ñita. Ye' tso' ikiök Skëköl a tö e' wa ì buaë kos wëmisö Cristo dalërmik, e' ar be' éna. 7A yami, s'batse'r malepa kos er pableke be' tö buaë, ie'pa dalër taië be' éna. E' tö ye' tssë'weke buaë, tssësua ye' er dekañe.

Pablo tö Onésimo tté ché Filemón a

8,9E' kueki ye' tö be' a ikië er bua' wa tö ì kiekeyö be' a, e' wà ú. Cristo tö ye' a kawö mé be' kök iuk. Erë se' ñi dalër taië, e' kueki ye' tö be' a ikieke er bua' wa. Ye' dör Pablo këkëpatke tso' wötëulewa Cristo Jesús tté pakë kueki e'. 10Ye' be' a ikië tö Onésimo saüne er bua' wa. Ie' erblë Jesús mik ye' ttö wa íe wé ye' tso' wötëule ee. E' kueki ie' dör wes ye' alà es.

11Kuaë ta ie' bak be' wa toulettsa be' kanë mésoie kè dör ìie bua' be' a, erë ì'ñe ta ie' dör buaë be' a ñies ye' a. 12Ie' dalër taië ye' éna, erë ye' tö ie' patkémie be' a. 13Ye' a ta imú e' tsùat ye' ta ye' kimoie be' skéie ye' tso'ia wötëulewa Jesús tté buaë pakë kueki e' dalewa. 14Erë kè ye' éna ì wak kam be' tö ikéwö mù e' yökì. Ye' kì ikiane tö ì weke be' tö, e' ùbö be' wák er wa, kè dör tö ye' tö be' ké iuk e' kueki. 15Isalema ie' minea be' yökì ekuölö è as idöne tso' be' ta kekraë. 16Erë ie' dene e' kè dör kanë mésoie è, ie' dene be' yamiie Jesús tté wa dalër taië be' éna, e' dör buaë shute kanë méso èse tsata. Ie' dalër taië ye' éna, erë ie' dör be' kanë méso, ñies ie' dör wes be' èl es Jesús wa. E' kueki be' ké idalëritsök, ye' tö idalëritseke e' tsata.

17Be' tö ye' klö'wé be' yamiie Jesús mik erblë e' wa, e' ta ie' klö'ú wes ye' wák es. 18Ie' tö ilè sulu wamblë' ö be' tö ie' ña'weke ilè kueki, eta ye' ña'ú iskéie. 19Ye' dör Pablo tso' yëkkuö i' shtök ye' wák ulà wa, e' wák tö ie' nuì patueraë. Kè ye' éna ichak, erë kè be' éna ichökwa tö ye' ttö wa be' tö Jesús tté klö', e' kueki be' wa nuì ta'ia ye' a. 20A yami, be' we'ikèyö, be' mú er buaë chö ye' a Skëképa Jesús dalërmik. Ye' er pabló Cristo batamik.

21Ye' wa ijcher buaë tö be' tö ye' iuteraë, e' kueki ye' tso' yëkkuö i' shtök be' a. Ye' éna iane buaë tö ì kiéyö be' a, e' tsata be' tö iwëraë. 22Ñies Skëköl mú tö kawö mè ye' a a' pakoie wes a' tso' ie' a ikiök es. E' kueki u yuló ye' a.

Pablo e' chéat

23Epafras tö be' shké'wémi. Ie' tso' wötëule ye' ta Cristo Jesús tté pakë kueki. 24Ñies Marcos, Aristarco, Demas ena Lucas, e'pa kanëblöke Skëköl a ye' ta, e'pa tö be' shké'wémi ñies. 25As Skëképa Jesucristo er buaë chö be' a.